

## STARFSREGLUR

### fyrir svæðisskipulagsnefnd sveitarfélaganna á Snæfellsnesi.

#### 1. gr.

Sveitarfélögin á Snæfellsnesi, Snæfellsbær, Stykkishólmsbær, Grundarfjarðarbær, Eyja- og Miklaholtshreppur og Helgafellssveit, hafa komið á fót svæðisskipulagsnefnd sem hefur það hlutverk að vinna tillögu að svæðisskipulagi fyrir svæðisgarð á Snæfellsnesi og fjalla um breytingar á því.

Meðal markmiða svæðisgarðs er að vernda og viðhalda náttúru- og menningararfi svæðisins og nýta hann samhliða til verðmætasköpunar. Stefna sem á þessu byggist verður sett fram í svæðisskipulaginu. Svæðisgarði er jafnframt ætlað að stuðla að aukinni samvinnu ólíkra aðila til eflingar svæðisins, efnahagslega og umhverfislega.

#### 2. gr.

Bæjarstjórnir Snæfellsbæjar, Stykkishólmsbæjar og Grundarfjarðarbæjar skipa tvo fulltrúa hver í nefndina, hreppsnefndir Eyja- og Miklaholtshrepps og Helgafellssveitar skipa einn fulltrúa hvor, og jafnmarga til vara.

Hver fulltrúi, sbr. 1. mgr., fer með eitt atkvæði á fundum.

#### 3. gr.

Svæðisskipulagsnefndin kýs sér formann og varaformann. Nefndin kýs sér jafnframt ritara úr sínum hópi eða felur starfsmönnum eða ráðgjöfum nefndarinnar að rita fundargerðir og annast tilheyrandi frágang og utanumhald nefndarstarfsins.

Meðan svæðisskipulagið er í gildi skal svæðisskipulagsnefnd skipuð að loknum hverjum sveitarstjórnarkosningum.

#### 4. gr.

Hlutverk svæðisskipulagsnefndar er tvíþætt. Annars vegar vinnur nefndin svæðisskipulag fyrir svæðisgarð á Snæfellsnesi í nánu samstarfi við þá aðila sem að svæðisgarðsverkefninu standa, fulltrúa atvinnugreina og íbúa. Nefndin annast vinnslu, kynningu og afgreiðslu svæðisskipulagsins og umhverfismats áætlunarinnar undir yfirstjórn viðkomandi sveitarstjórna. Hins vegar, eftir staðfestingu svæðisskipulagsins, er hlutverk nefndarinnar að sjá um framfylgd og breytingar á svæðisskipulaginu.

Í starfi sínu tekur svæðisskipulagsnefnd mið af markmiðum um svæðisgarð.

Skipulagsáskvarðanir svæðisskipulagsnefndar eru háðar samþykki allra hlutaðeigandi sveitarstjórna.

#### 5. gr.

Vinna svæðisskipulagsnefndar felst m.a. í því sem hér segir. Nefndin tekur saman lýsingu á skipulagsverkefninu í upphafi svæðisskipulagsvinnunnar, sbr. 1. mgr. 23. gr. skipulagslaga og leitar samþykkis sveitarfélaganna fimm á lýsingunni. Að því loknu kynnir nefndin lýsinguna opinberlega og leitar samhliða umsagna Skipulagsstofnunar og valinna umsagnaraðila. Svæðisskipulagsnefnd hefur jafnframt samráð við Skipulagsstofnun um umfang og nákvæmni upplýsinga í umhverfisskýrslu, sbr. 6. gr. laga um umhverfismat áætlana. Síðan vinnur nefndin svæðisskipulagstillögu og umhverfisskýrslu í samræmi við fyrirliggjandi lýsingu.

Nefndin kynnir svæðisskipulagstillögu ásamt umhverfisskýrslu fyrir almenningi, leggur hana fyrir hlutaðeigandi sveitarstjórnir til samþykktar og sendir hana að því loknu til athugunar hjá Skipulagsstofnun. Að lokinni athugun Skipulagsstofnunar er tillagan auglýst í samræmi við ákvæði 24. gr. skipulagslaga og gefinn frestur til athugasemda.

## 6. gr.

Á vinnslutíma svæðisskipulagstillögunnar skal halda fundi í svæðisskipulagsnefnd eftir því sem þörf krefur, að jafnaði þó eigi sjaldnar en á 2ja mánaða fresti.

Fundargerðir svæðisskipulagsnefndar eru sendar hlutaðeigandi sveitarstjórnnum sem leggja þær fram til afgreiðslu á næsta fundi sveitarstjórnanna.

Formaður nefndarinnar, eða starfsmaður nefndarinnar fyrir hans hönd, boðar til funda með a.m.k. þriggja daga fyrirvara. Boðun með tölvupósti er fullgild, en ganga skal eftir staðfestingu nefndarmanna um mætingu.

Fundur er lögmætur ef formaður eða varaformaður og helmingur nefndarmanna eru viðstaddir. Leitast skal við að ná samkomulagi um ákvarðanir og afgreiðslur svæðisskipulagsnefndarinnar. Takist það ekki ræður afl atkvæða.

Þó getur nefndin ekki ályktað um mál sem varða sérstaklega hagsmuni eins sveitarfélags að fulltrúum þess fjarstöddum.

## 7. gr.

Sveitarfélögin ráða skipulagsráðgjafa til að stýra vinnu við gerð svæðisskipulagsins og sinna annarri nauðsynlegri ráðgjöf henni tengdri. Gerður skal skriflegur samningur við ráðgjafa. Kostnaður vegna svæðisskipulags fyrir svæðisgarð á Snæfellsnesi greiðist af sveitarfélögunum í hlutfalli við íbúafjölda 1. janúar 2012, og með framlagi Skipulagssjóðs, í samræmi við samþykktu þátttöku sjóðsins, sbr. svarbréf Skipulagsstofnunar til svæðisskipulagsnefndar dags. 23. júlí 2012, sbr. 2. tl. 1. mgr. 18. gr. skipulagslaga. Hlutur sveitarfélaganna skiptist þannig:

Snæfellsbær	44%
Stykkishólmsbær	28%
Grundarfjarðarbær	23%
Eyja- og Miklaholtshreppur	3,4%
Helgafellssveit	1,6%

Samkvæmt samningi sveitarfélaganna og samstarfsaðila um svæðisgarð, 7. mars 2012, munu þó Snæfellsbær, Stykkishólmsbær og Grundarfjarðarbær greiða 50% af áætluðum hlut Eyja- og Miklaholtshrepps og Helgafellssveitar í umsömdum áföngum svæðisgarðsverkefnisins, m.a. við gerð svæðisskipulagsins. Munu sveitarfélögin þrjú skipta þeim kostnaði á milli sín í hlutfalli við íbúafjölda 1. janúar 2012. Hlutur Eyja- og Miklaholtshrepps í gerð svæðisskipulagsins skv. samningi 7. mars 2012 verður því 1,7% og Helgafellssveitar 0,8%.

Hvert sveitarfélag greiðir kostnað vegna þátttöku sinna fulltrúa í svæðisskipulagsnefnd, s.s. nefndarlaun, aksturskostnað og annan kostnað. Kostnaður vegna einstakra breytinga, undirbúnings þeirra og kynninga, greiðist, eftir staðfestingu svæðisskipulagsins, af viðkomandi sveitarfélagi eða þeim sameiginlega þegar við á, í samræmi við íbúafjölda.

## 8. gr.

Starfsreglur þessar, sem settar eru samkvæmt 4. mgr. 9. gr. skipulagslaga nr. 123/2010 með síðari breytingum, öðlast þegar gildi.

*Snæfellsnesi, 12. febrúar 2014.*

**Guðbjartur Gunnarsson,**  
oddviti Eyja- og Miklaholtshrepps.

**Egill Valberg Benediktsson,**  
oddviti Helgafellssveitar.

**Björn Steinar Pálmason,**  
bæjarstjóri Grundarfjarðarbæjar.

**Kristinn Jónasson,**  
bæjarstjóri Snæfellsbæjar.

**Gyða Steinsdóttir,**  
bæjarstjóri Stykkishólmsbæjar.